

finis est impositus: non tantum enim egre-
grie restiterunt Japones, sed & Tartaros è
tota illa regione, quotquot deprehensi sunt,
expulerunt, adeo ut nunquam eam am-
plius postmodum tentare sint ausi; ipsisque
Sinis tamquam imbellibus, quod se Tartaris
subdidissent, objecerint suam inertiam, ac
summopere fuerint indignati; unde postmo-
dum similitates atque inimicitiae ortæ sunt,
bellaque sæpius Japones inter ac Sinas infe-
stis utrimque animis atque armis gesta sunt,
qui maritima præcipua loca longe lateque
sunt deprædati, & maxime Coream igne
ferroque vastarunt: de hoc bello à Tarta-
ris Juenæ familæ cum Japonibus gesto, agit
Marcus Paulus Venetus, qui hujus quoque
belli exitum leviter perstringit.

*Nomen
Iaponia.* De nomine Japoniæ hoc unum habeo
quod addam. Sinae Japoniam Gueique, Vo-
çu, & Gepuen dicunt: primum nomen
inde ortum, quod Archithalassus ille, qui à
Xio in Japoniam fraudulenter missus est, ex
Guei Sinica fuerit familia. Voçu autem,
non regionis sed gentis nomen est, quo
tamquam barbaræ linguæ homines Japones
afficiunt, notantque quasi per ludibrium,
aut ut minimum, contemptum. Cæterum

proprium nomen Gepuen est, quod solis
originem sive primum solis locum signifi-
cat; adeoque ita Japonia haud immerito à
Sinis dicta videtur, quia ultima est regionum
cognitarum versus ortum, primaque terra-
rum solem videtur Sinis excipere, inde enim
eum exsurgere vident: neque enim orbem
esse putabant reliquum, imo nec solem cir-
cuire, unde eodem modo occasum Sinae vi-
cinum, seu partes quæ ibi ad occidentem
vergunt, Jeuco vocant, hoc est obscuram
vallem, in qua solem noctu credunt delite-
scere. Nec ab hoc nomine differt, quo sese
appellant ipsi Japones, nisi penes dialectum,
cum Gipuen pronuntiant; M. Paulus Zi-
pangri dixit, more Tartarico littera R in-
termixta, quod idem, ac si diceret Gepuen-
gin: Ge solem, Puen originem, Gin homi-
nem significat. Vnde autem Japonia etiam
Chryse dicta sit, facile assequi nequeo: for-
te illud Tartaricum nomen est, quo Japo-
niam vocant, uti Sinam Catayum. De quo
cum mihi quid certius ab ipsis Tartaris,
quos adire animus est, constiterit, faciam ut
ne diu etiam in hoc volumine desideretur.
Tu, amice Lector, conatibus nostris fave, &
longum vale.

Omnia ad majorem D E I gloriam.

F I N I S.

